CBETA電子佛典集成

CBETA Chinese Electronic Tripitaka Collection ebook

T15n0635

佛說弘道廣顯三昧

經

西晉 竺法護譯

目次

- 編輯說明
- 童節目次
 - 1<u>得普智小品(一)</u>
 - 。 2_清淨道品(一)
 - 。 3 道無習品(一)
 - · 4 請如來品(二)
 - 。 5 無欲行品(二)
 - · 6 信值法品(三)
 - 7 轉法輪品(三)
 - · 8 決諸疑難品(三)
 - 。 9 不起法忍品(四)
 - · 10 眾要法品(四)
 - · 11 受封拜品(<u>四</u>)
 - 12 屬累法藏品(四)
- <u>卷目次</u>
 - 001
 - · <u>002</u>
 - 003
 - · <u>004</u>
- 贊助資訊

編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta,org 回報。
- <u>版權所有</u>,歡迎自由流通,但禁止營利使用。

No. 635

佛說弘道廣顯三昧經卷第一(一名入金剛問定意經)

西晉月氏三藏竺法護譯

得普智心品第一

聞如是:

一時佛遊王舍國鷲山之頂,與大比丘眾千二百五十人,諸菩薩八千人俱。于時世尊!廣為無數百千諸眾而所圍繞敷演說法。

爾時有龍王名阿耨達(晉言無熱),宿造德本遵修菩薩堅住大乘,行六度無極,以具滿相勤救眾生化道無極。曾事九十六億諸佛,積累功德不可稱數,執權方便普現五道拔諸愚冥,使修菩薩無欲之行,懷慈四等濟度一切;傷愍罪類故現為龍,化龍億數使免殃行。自處于池率諸眷屬八千萬眾,又將婇女十四萬人,周匝導從調作倡伎,其音和雅乘龍感動,協懷威德神變自由,齎眾雜花奉最妙香,擎持幡蓋而詣世尊。至輒稽首敬問如來,尋以所持香華、雜寶、繒綵、幡蓋,重調音樂欣心敬意,與眾眷屬及諸婇女俱進詣佛,則前長跪肅然叉手,而白佛言:「欲問如來、無著、平等最正覺!菩薩所應行道當云何?唯蒙聽許乃能敢問?」

爾時世尊告龍王曰:「恣汝所問,勿疑勿難所欲,如來、至真、等正覺當隨敷散解釋汝心。」

時阿耨達得為神尊所聽質疑,心益欣悅,而白佛言:「天師最尊人中聖導,猛如師子感變無量,吾問如來普及眾生,亦為菩薩大士之故,為世師者拔過俗法,志行清淨明盡因緣,濟度群生作無請友,心普安救誘育立之,執持無畏、十種力,進伏眾魔降諸外道,心無穢行,被堅金剛大德之鎧,志不有惓,積德因緣不可計量,施、戒、忍、進、定、智已備,心等一切蠲除雜相、棄捐二見,以越智度解因緣法,已入深奧難極之要,去離聲聞、結一覺念,不捨大乘一切智心,意行堅強常得自在,身淨無垢暉曜明徹,志若虛空,生無相、願,以過如住夢幻影響野馬水月,於斯諸法等解不動,重三寶教奉而敬之,轉其法輪而無所礙,欣悅信樂皆自得之。如優曇花億世希出,志靜安獨普有具相,宿樹恭恪明賢大士,尊修上義法住若此,為彼正士故問如來。唯願如來、至真、等正覺!解說菩薩大士所行,得遊法門入金剛德果達深妙,使其修應獲總持場,以四諦行順化聲聞使解要真,導眾緣覺靜起因緣,獎以一心使等正覺,欲

達諸法當入大乘,曉入大乘能伏魔場,散棄疑結過度罪惱,普知眾 生意志所行,積最辯達布演諸法,隨一切願化示所欲。

「善哉!世尊、如來、無著、平等正覺!廣為賢明大士之故普弘演說,使諸菩薩得致智力;降己自大得法上力;曉解央行不有所造;使得施力,所有無惜惠不望報;使得戒力,等除眾罪而過諸願;使得忍力,於諸苦法受生之處身命無惜;得精進力,積眾德本志常無惓;使得定力,善寂居靜解定要行,使得慧力,而過邪見疑冥昧昧:曉權方便濟度眾生,明了勸助具達五通,天眼無限,徽聽、知心、神足、明宿,以此遊樂。果大辯才,辯才句義無盡不斷,便得總持志無恍忽。令逮海印三昧正定,進隨普智果同一味;得佛志定習樂通行,永常奉尊而無障蔽;逮法志定勉進定意,長久聞法都無限礙;崇眾志定普令一切奉不退眾;得施志定,俗貨法施不有遺惜,具足於戒;行念靜定使速得佛,心而無忘;昇天志定,常念兜述一生補處,志樂菩薩清高之行。」

爾時龍王質疑畢訖,悅心怡懌,重以讚頌啟問世尊:

「大仁願說現世義, 菩薩德行所當入; 興發何道行云何? 內性志操所應修, 順導以蒸行入悲, 意以度眾護濟念; 弘化定智使清淨, 願垂哀傷而普說。 誘眾止意及意斷, 根、力、神足行如是! 演道七譽散示眾, 願說彼德所應奉。 施調撿戒德具足, 忍力普行及精強; 慧志因緣轉無量, 云何度彼蒙說之? 辯才捅達勉愚冥, 志行詳審常清淨; 諸起牛者即覺知, 唯願為諸菩薩說。 欣悅之德有歡豫, 聖種七財是行最; 樂遊閑居及修靜, 唯蒙慈尊廣度說。 辯才行具云何得? 深致總持永安住; 聞輒奉行終不忘。 弘法要說常無斷, 寂滅清淨而行觀, 覺意深邃智廣博; 其慧難究德無邊, 解行云何應菩薩? 制持魔力與怒意, 毀壞外道眾邪類; 勇德難動若大山, 月明至游弘說之。 解了野馬及幻法; 曉空無想性所在, 夢想體像計皆無, 唯願世尊指示說! 」

於是世尊告龍王曰:「善哉善哉!快甚無比,乃自發心啟疑如來。 今汝所問承宿功德,已顯大悲為眾志友,不勞生死弗斷三寶。王之 質疑用是故也,聞以諦聽受而思惟,吾當廣說菩薩大士應所修行, 彼此無限果最要法。」

時龍王言:「大善。世尊!願樂思聽聞輒受行,宣布十方勸進無 惓。」

於是世尊答龍王曰:「有一法行,菩薩應者相好備具得諸佛法。何謂為一?造起道意不捨眾生,是謂一行致諸佛法。

「又有三十二事得普智心,當勤樂行專意守習。何謂三十二?御修內性,執上最志,昇行大慈,堅固大悲,志慕無厭,發於精進,仂具猛勵,而德強力。又踰聞勢,安靜無煩,為眾忍任,習近善友。專行法事,執御權化,施備忍行,樂於撿戒,諂想已無,滅斷偽侫,言行相應。志存反復,常有愧色,內自慚恥。已調怡悅,根行至信,意而制御,得持功德,志遠小道,樂弘大乘行,觀一切三寶之事使其不斷。是謂,龍王!三十二法,菩薩應此逮普智心。

「又復龍王!有十六事進增普智顯力弘<mark>軌</mark>。何謂十六進普智耶?施行眾濟,具戒無缺,忍應調忍,果上精進,致定諸行,已具智慧。信行悉足,供事如來,遊靜樂閑,備六堅法,有最十善。飾身口意,德具操行,知足樂靜。身三勸彼,修勝定觀諸德得備。是謂十六行法之事,應相祥福演大智心,顯持佛世流化自由。

「又復龍王!其普智心,以二十二事而除邪徑,以其大乘志修普智。何謂二十二事?行過聲聞、緣一覺意,已下貢高,無我自大, 消去諂事。抑俗雜言,遠棄非戒,拔恚怒根,免却魔事,除去蔽 礙。不章師訓耗滅罪除,省已切惻,不論彼非。習離惡友,遠逆良 善。去非六度,又逝貪惜,戒無不消。已棄諍訟,而離懈怠,於迷 自正。捨諸無知,斷去無便,却去惡行。是謂菩薩普智釋除二十二 邪軌,速應權慧永無懈退。

「又復龍王!二十二踊事,進順隨行得普智心而不可當,諸魔波旬及魔官屬并與外道降而却之。何謂二十二?踊過戒事,踊過於定,亦踊過智而過慧行,踊過權化,亦過大慈,踊過大悲。以要言之,過空、相、願、我、人、壽命,過離眾見及發因緣,過心自淨承覺神聖,過於識念應不應見,過大金剛堅固之行。是謂,龍王!菩薩所行二十二踊法致普智心。一切眾魔及諸魔身并邪、外道不得自在,無敢當者悉降却之。

「又復龍王!其普智心,依二行處致普智心。何謂為二?如其所言 修應行處,諸功德本觀道行處。是謂二事普智行處。

「復有二事,其普智心而不可毀。何謂二事?在於眾生無增異心, 於諸殃行濟以大悲。是謂二事普智無毀。 「又復龍王!其普智心有二重法而無過者,生死之黨及眾聲聞并諸 緣覺無能勝踰。何謂為二?執權方便,深行智慧。是為二事普智重 法。

「又有二事休普智心。何謂為二?處毀無疑滯結之心,在在不安樂 俗諸樂。是謂二事休普智心。

「復有二事護普智心。何謂為二?不志聲聞、緣覺行地,觀覩大乘至美之德。是謂二事護普智心。

「復有二事妨普智心。何謂為二?志常多侫,內性懷諂。是即二事妨普智心。

「復有二事不妨普智。何謂為二?專修直信,行于無諂。是謂二事不妨普智。

「又有四事蓋普智心。何謂為四?數亂正法,於諸菩薩、賢明達士 亦不奉敬,常無恭恪,不覺魔事。是為四事蓋普智心。

「復有四事,於普智心而無其蓋。何謂為四?護持正法,謙恭受聽,尊重菩薩視若世尊,常覺魔事。是為四事普智無蓋。

「又有五事致普智心。何謂為五?所行無望於生死漏用戒德故,不 捨一切以大悲故,憎、愛無二身命施故,財利周惠供事法故。是為 五事得致普智。

「復有五事進普智心。何謂為五?習善知識,不患生死,志遠無益,去非時心,求諸佛智。是為五事進普智心。

「復有五事在普智心,過諸聲聞、緣覺一覺念。何謂為五?過聲聞 脫,過緣覺脫,過眾智心,過諸吾我,又過習結。是為五事過諸行 法。

「復有五事於普智心而有其悅。何謂為五?悅過惡道,悅審普智, 悅具覺慧,悅戒無厭,悅解眾行。是為五事普智之悅。

「復有五事發普智心,得五力助不溺生死。何謂為五?無其怒恨用 忍力故,能滿諸願用德力故,降己自大以智力故,勤勢廣聞用慧力 故,過眾恐怯無畏力故。是為五事致諸助力。

「復有五事在普智心得五清淨。何謂為五?體眾穢行淨,諸墮者因緣諸根無惑淨之,隨順諸時以觀淨之,行治於等權道淨之,一切諸法化轉淨之。是為五事普智清淨。

「復有五事得普智明。何謂為五?明解無欲,明己彼心,明於五句,明達慧行,明眼無礙。是為五事致普智明。

「復有五事廣普智心。何謂為五?以其五種、五根、五莖、五枝、 五葉、五花、五果。

「何謂為五種?日修志修,而淨內性,等觀人物,求習脫行,弘於權變。是為五種。

「何謂五根?以大慈悲,德本無厭,勸進眾生,使免小乘,不志餘 道。是為五根。

「何謂五莖?曉權方便,慧度無極,示導人民,護持正法,等觀喜 怒。是為五莖。

「何謂五枝?施度無極,戒度無極,忍度無極,進度無極,定度無極。 長為五枝。

「何謂五葉?樂進聞戒,求處空靜,常志出家,心安佛種,所遊無 礙。是為五葉。

「何謂五花?得文相具積滿德故,眾好繡備種種施故,七覺財具心無雜故,致有顯辯不蔽法故,深達總持聞無忘故。是為五花。

「何謂五果?昇致戒果,已得度果,達緣覺果,又得菩薩不退轉果,獲佛法果。是曰五果。

「斯謂,龍王!菩薩七五三十五事廣普智樹道寶行也,修應之者得佛不難。」

佛告龍王:「其有菩薩欲受持此普智心樹深妙明顯要行句者,當勤加習普智寶樹。如是龍王!吾視一切諸法功德,莫不由斯寶樹奧義;諸發無上正真道意,悉皆因是普智寶樹至要句也。譬如,龍王!選植樹種,知此已致樹之根、莖、枝、葉、花、果而甚盛茂也。如是,龍王!其有能受普智心種,斯已得致諸佛賢聖最上慧法三十七品。是故,龍王!欲入普智所行功德、欲轉法輪,當受持此,精修誦讀專心習行,廣為一切宣傳布演。如是,龍王,勤受學此。」

當佛說斯普智心品法語之時,諸龍眾中七萬二千,皆發無上正真道意;龍王太子及諸婇女萬四千人,悉皆逮得柔順法忍;五千菩薩承宿德本悉得法忍。

時阿耨達并餘龍王及諸眷屬,自乘神力踊昇虛空,興香之雲忽便普布,調和美香及末栴檀,微雨如來及眾會上。又化琦妙珠交露蓋,遍覆王舍一國境界,而悉歡悅於上歌詠至真如來積祚巍巍聖德無量,列住雲日各現半身光文虛空,一切眾會莫不見者也。

清淨道品第二

於是龍王復白佛言:「甚未曾有。唯然,世尊!乃若如來博為眾生說道俗及心普智心行德所應。又唯,世尊、如來、無著、平等正覺!願演散說菩薩之行,修應清純明賢所由,得道清淨使其終已,長久無垢不中有懈,無惨弗退至得十力、四無所畏,而得具足諸佛之法。」

爾時世尊告阿耨達:「善哉龍王!勤思念行,吾當廣說菩薩大士清淨道品。」

阿耨達曰:「甚善世尊!幸蒙授教,唯願說之。」

於時聖尊告龍王曰:「菩薩行有八直正道,當勤受持。何謂為八? 六度無極道,恩行之道,得五通道,行四等道,及八正道,等眾生道,三脫門道,入法忍道。如此,龍王!是為菩薩八正行道。

「何謂菩薩度無極道?度無極道者,諸所布施勸彼普智。何則然者?不以無勸施成普智,其行勸助於德本者,斯得施度無極名目; 又及行戒、忍、進、定、智,亦以勸助彼普智心,乃得慧度無極名目,是曰菩薩度無極道。

「恩行道者,含受眾生。何則然者?以彼菩薩演示法度,菩薩行恩 含受一切,覆以四恩廣為說法,而使眾生順受戒化。是四恩道。

「神足道者, 覩諸佛土天眼徹視, 見眾一切生者終者, 又見十方諸佛世尊、弟子圍遶, 悉見如是;於諸佛土以其天眼, 應當所採而採受之。又其天耳聽諸佛言聞輒受行, 在於眾生及諸類人, 而皆明曉悉了知盡, 為隨說法得識宿命, 不忘前世所作功德。又具神足遊過無數諸佛國土, 應以神足當得度者, 輒弘神足而度脫之, 是神足應道。

「又何謂為四等行道?其隨修淨梵志中者并及諸餘色像,天子!知 彼意行隨順化日,斯則慈悲、是為喜護,建立以道使彼應度。此謂 菩薩四等行道。

「其八正道普悉行之,聲聞所由、緣覺依因,大乘亦然!是謂賢聖 八直正道。

「何謂心等諸眾生道?當為此興、不為是興,為斯可說、為此不應,是有賢德、此非福人,斯為盡應、此復不應,行等菩薩盡除此意,是謂心等諸眾生道。

「何謂菩薩三脫門道?得致以空斷諸妄見,以其無相除眾念想應與不應,以其無願永離三界。是謂菩薩三脫門道。

「何謂得致法忍之道?受拜菩薩,菩薩自覺行應於忍,得為諸佛世 尊所決授者無上正真道意。是謂菩薩不起忍道。

「菩薩致此八直正道,弘化流布權導無礙。」

時佛說是八正道已,二萬四千天龍及人悉逮應此八道行也。

「若是,龍王!菩薩以此八直正道等塗一歸,用無等故,莫有能與菩薩比者,亦無其侶、獨步三界,靜一心時修致慧行,應當所得已自果之,明達諸法而如本無,斯謂如來!是曰龍王八正之道。為彼一切,凡諸若干眾生所行,興種種說,而此要說等同一向以無望說,歸未至說也。

「云何於此道清淨耶?曰:道無垢,用無塵故;是道無瑕,本無念故;是道無冥,慧照明故;是道無著,本清淨故;道常無生,無所滅故;道如永無,本無有故;道無漏穢,三界淨故;是道寂然,過凡行故;道無可至,無有去故;道無所來,無從來故;道恒無住,過諸欲故;道無所處,過眾見故;道無勝者,過諸魔故;道大弘覆,外道不及故;道永離妄,自大者故;道無所容,不修入故;是道極遠,用希望故;道為永離,過愚夫行故;道可果致,修行者故;是道夷易,樂勤行故;道極平坦,住正見故;是道無妨,修無毀故;是道無礙,等正行故;是道無垢,三毒淨故;是道清淨,終無著故。是謂菩薩道之清淨。

「若是菩薩於清淨道務進勤修又應行者,彼於法性已悉清淨,得淨我性亦以而過。法性淨故則數性淨;數性淨故無數性淨;無數淨故得三界淨;三界淨故眼識性淨;眼識淨故意識性淨;意識淨故得空性淨;空性淨故諸法性淨;用是淨故則諸法等等淨;如空空等淨故得眾生淨。以諸淨故便無其二亦不著二,無二淨故則道清淨,以斯言之清淨道也。彼無眾念亦不念道,諸念悉淨若如泥洹,於彼永無,是謂無念。應無所念,無念道者亦無識念,其道都無心意識行,以此言之清淨道也。」

說是清淨道品法時,二萬天人皆得法忍。

時阿耨達復白佛言:「云何,世尊!菩薩大士修是清淨而應向 道?」

聖尊告曰:「如是,龍王!菩薩大士欲行斯清淨道意者,當曉淨行,亦使其身、口、意清淨。

「何謂身淨?己身已空,解諸身空;身之寂靜,解諸身寂;身之已 脫,解諸身脫;身之怠慢,解諸身怠;身之如影,解諸身影。是謂 菩薩清淨道也。又云身淨,身行無生,其有生死觀於無生,彼以無 生而等生死,則其知身亦曉身行。何謂身行?去來生法,來無盡 法,見在景法,終無盡法。其無盡者,是謂身行。

「又復身法因緣合會,其因緣者,則空無想淡然無念。若此,龍 王!是像法觀,斯謂身淨。又若如來身之無漏、不墮三界,觀身無 漏如如本無,以無漏身不墮三界。彼無漏身能入生死,其無漏際無 惓捨退,以無漏身示現色身。如此現已,亦不念滅身之法本。如如 來身淨,眾生身淨、己身亦淨,等如本無,是謂菩薩行應清淨。

「何謂口言為應清淨?一切賢愚言皆清淨。所以者何?用等相故。 凡夫劣勢著於音聲,若信不諦憂喜無常,樂於顛倒。觀察眾生無 本,都無婬、怒、癡欲。何則然者?以諸字說聲出皆淨,無欲、 恚、愚,亦無其著,以此謂之一切言淨。 「以言言之,何者為言?以欲、恚、癡而為言耶?諸垢為言乎?言者無著,不著眼、耳、鼻、口、身、心。所言風像,風動聲出,因緣合會使有聲耳;所言如響,賢愚所言皆同如響;所可言者,不住於內亦不出外,於其中間而不可得,住本所念及其所行,出於言者并所念想無住無想。是謂,龍王。如來所言及其眾生一切音聲皆空、非真,損斯法耳!」

曰:「唯,世尊!如來所言斯不諦耶?」

曰:「是。龍王!如來審諦。所以者何?如來諦故,解知諸法非真非諦。又復龍王!如來所言隨字音聲,皆答眾生一切音聲,爾故眾生亦轉法輪,而亦不知法之義順,以此報應使其行之,隨如等滅眾苦之事曉解諸法,行了如是。眾生音聲已無所住,在諸煩惱而常閑靜,現出欲言於著無著,聲出所言講論談語,其如法者不有違錯,是謂菩薩口言清淨。

「何謂菩薩心為清淨?其心本者不可染污。所以者何?心本淨故。 其所可謂客欲垢蔽,菩薩於斯不有所著,了解以權於本自淨。又其 心行不撰德本,彼德本者了識心本,以此心行慈及眾生,識了知彼 空無我、人,其心德本助<mark>勸</mark>於道知等彼道。觀如是者斯謂心淨。以 此淨心,與諸婬、恚、愚行者俱,而永不受欲、怒、癡垢;與操行 俱,不著諸穢。是謂菩薩身三清淨。」

說斯清淨道品法時,三萬菩薩逮補生處。

道無習品第三

「又復龍王!其菩薩者乘是淨心,生於欲界而在形界,與諸天俱處眾梵中詳安靜然,在中進止無勝動者;又斯菩薩能降諸天化道以權,或生形界而在欲界,現如有家與諸眾生周旋坐起,不與有勞、弗慢眾生,亦無自輕。彼以斯淨,諸定正受盡自為定,不隨正定而有所生。何則然者?以彼菩薩執權方便心應淨故。若此,龍王!菩薩曉解清淨行者,當修清淨已而習道。

「如是,龍王!菩薩不習以求道習;不習無習以想道習,亦不習於 望道之習亦不求習;了解道習不習所生;冀向道習不習行滅而為道 習;亦不求習以為道習;不習無習為道之習;不習執捨以習道習; 不我人壽,不身無常、不身性苦、不身有我、不身夢幻野馬影響; 亦不身空、無相、無願;不身無欲法身習道。以要言旨,身性諸 情,亦不興有十二因緣,乃至老死無欲之法,不數無數道無二習, 不俗無俗、不漏無漏、不犯無犯,不二之習以求道習。又復諸法無 習之習,是道無習,斯謂道習不習之習。如空無習亦不無習,當如 此習是道無習;無相、無願,彼不作習亦非無習,當作是習。無[禾*禺]不[禾*禺]諸法無住,勤習如此乃應道習。」當佛世尊說是清淨行無所習道品法時,三萬二千天及世人悉皆逮得無所從生法樂之忍;五萬天人宿不發心於菩薩者,皆發無上正真道意;七萬菩薩逮得法忍。爾時一切同聲而言:「世尊!其有族姓之子及族姓女,逮聞說是清淨道品無習法者,其值聞已心無驚恐不捨退者,是皆受習如來無上正真道意,得轉諸佛所轉法輪。又唯,世尊!是輩菩薩悉獲無上正真道意,為無量人分布斯法,亦復當坐師子之座,當於天上、天下、人中極師子吼,猶若如今如來之吼,悉降魔眾伏摧外道,顯樹法幡熾法煇明,震雷法鼓已鳴能降法雨。」爾時世尊見諸天、龍、神之眾,人與非人又及四輩,聞其至說莫不悅懌。於是如來為阿耨達重復弘演,而說頌云:

「道非習可得, 無乃興習想; 其道行如此, 棄離習念行。 不望求習道, 蕩除眾異想; 其道都無習, 清淨像明月。 若有起習想, 無處亦不習; 已過無習處, 得致最上道。 道為無我念, 亦不與空習; 是道無有二, 安快而無上。 命壽亦如此, 無人及與言; 其道不有人, 無命亦無住。 諸有習道者, 而欲住於空; 斯夫聖路遠, 是不應道習。 道亦無有空, 以捨於有習; 如本同一相, 永空空於空。 道為無起相, 亦不有滅相; 不起亦無滅, 彼悉為道習。 吾音譬如幻, 解想當如此; 持想行所習, 道當何從生? 道為都過俗, 彼不有身習; 亦無滅身行, 可得致於習。 本無所演廣; 是身根之家, 本無不可得。 彼不有餘求, 其習是道者, 當如如本無; 是謂應道習。 如本知本無, 諸法之本無, 所覺若如幻;

解行而致此, 乃應道之習。 若其不至道, 所作如不住; 無能止其行, 佛法不由道。 若如所習道, 并及與無習; 所演為如此, 以住於本無。 有限餘道者, 劣乘之所依; 是者無上道, 本乘所因由。 諸興此道者, 以致而無住; 斯則顯行德, 可致應道習。 道正而無嶮, 端直目平坦; 勤親行此道, 永離眾邪迹。 自住其宮室; 若如卿龍干! 不動於所處, 降雨充大海。 大士亦如是! 習道如所行; 法身而不動, 能滿於智海。 在於大地上; 又如仁龍王! 其不有身著。 以雨遍充足, 菩薩德如斯! 行此之所習; 用法滿眾生, 其內無所著。 若如阿耨達! 龍王大神變; 勝道德如是, 感動普十方。 諸墮受著見; 眾牛墮邪徑, 其住是道者, 將順度無為。 已住於斯道, 菩薩果大稱; 并及邪外行。 能降魔波旬, 如道無能動; 得道如其如, 其行譬蓮花。 踊過諸俗法, 道心無有愚, 是行為住止; 千數諸眾生, 化度立以道。 得致於五旬; 以常住斯道, 為眾廣說法。 神足諸感動, 諸事悉清淨, 身口及與意; 當願賢聖道, 人性不可識。 其往所可至; 忍行為無著, 斯得如來處, 示道諸眾生。 生死於至歸, 斯處則如來! 其往似若至, 此為無所至。 當念彼上處; 眾牛所可至,

學最佛之道, 遊樂以幻法。 其作是習道, 弘道之所習; 諸佛所稱歎。 彼眾德儀行, 其德無有邊, 終不可極盡; 如此習道者, 不習亦無住。 彼處不咎魔, 眾都不著行; 其順此道者, 不起亦無滅。 已得意志行, 總持弘大辯; 施惠及戒忍, 遂增進若海。 身口穢以無, 心潔乃清淨; 垢消永無瑕, 修應此道者。 得昇於知達, 所行習深妙; 守習是道者。 難動惠無即, 過去與當來, 其諸最正覺, 現在亦如是, 致道世所歸。 彼已離眾難, 值世遭難遇; 其聞此法者。 永為諸佛子, 快哉諸眾生, 至善聞斯法; 真應奉如來, 其樂是經者。 有曉此道者, 能斷諸情態; 紹德具眾相, 得應三界將。」

佛說弘道廣顯三昧經卷第一

請如來品第四

時阿耨達自與其眾諸眷屬俱,稽首世尊跪膝叉手而白佛言:「願請 天尊迴屈神光,往詣無熱之大池中,盡其三月,吾等志樂供養聖尊 并諸神通果辦菩薩及上弟子!蒙愍納許願受其請。所以然者?吾等 供事至真正覺,豈能應於如來儀耶?冀蒙逮聞寂靜上化,唯以此法 應供養也。思願重聞如是像法令常歡悅,此乃應奉於三寶耳!」 爾時世尊不受其請。重啟:「二月?」如來不然;「垂聽一月?」 世尊不可;「願納半月?」世尊默然而已受之。於是龍王自與其眾 諸將從俱,見尊受請忻喜悅懌善心遂生,遶佛三匝,興震雲電而降 微雨普遍天下,忽然之頃還昇宮中。 時阿耨達到坐正殿,頓召諸五百長子,其名:善牙、善施、善章、

時阿耨達到坐正殿,輒召諸五百長子,其名:善牙、善施、善意、善明、能滅、寂相、感動、大威、甘威、甘權、甘德、普稱、威勇、持蜜、忍力、行祥;如是比等五百長子,宿樹無上正真道已。王告之曰:「又諸子等!吾今以請如來、無著、平等正覺及眾菩薩諸弟子俱,盡其半月,世尊正覺垂大慈哀,興有弘愍而尋受請。汝等當共同一其心廣相勉勵,加敬世尊、至真、如來!勤念無常,當各寂靜,謙恪恭肅住待如來,儀應棄捐淫心欲意及龍戲樂,除貪、怒、害,離欲、色、聲、香、味、細滑。所以者何?世尊無欲而且詳安,仁雅審諦順調寂靜,顯備諸德侍從圍衛,儀容無量皆承諸佛真正要戒。以是之故,汝等半月無得入宮,當除婬、恚、愚癡之念。又復如來宣講法故,必有他方神通菩薩、釋、梵、持世、宿淨天子當普來會,汝等勤念廣施姝妙,光顯嚴飾慎勿中懈,令諸會眾觀變踊躍,此乃真應供養如來。」

時阿耨達都約勅訖,輒為如來於雪山下無熱池中,為世尊故化其無瑕淨琉璃座,而使縱廣七百由旬乃殊異妙,周匝列置八萬四千雜寶琦樹,挍以眾珍諸寶鮮飾,蔚有光華精耀百色中出美香。諸樹間化八萬四千七寶之堂,眾珍光彩極好無雙,施置十萬交露綺帳,乃垂異妙赤真珠貫。在諸堂上有師子座,八萬四千皆大高廣,而布無價妙好雜氎床座寶分,施諸交露挍以眾寶。所在堂上有龍、婇女各二千人,其色姝妙姿美無量,顏像蔍華口出熏香,擎持雜花、末香、塗香、調作諸妓,以詠佛德、興悅眾會、於上虛空化大寶蓋,周千由旬遍覆會上琦珍綵鏤,其寶蓋中眾色無數,懸好繒幡,於幡綵間

垂諸寶鈴,景風和降音踰諸樂,施饌百味備辦都訖。為此變已,與 其眷屬恭撿叉手,向佛跪膝而遙啟尊,以其請意歎詠頌曰:

「慧藏知富積辯德, 慧達無著明導眾; 慧弘普至不有礙, 慧上最力降神光。 慧解心行唯大仁! 當觀十方眾生類; 最上神尊受吾請, 念啟慈愍唯時屈。 知足無貪而易養, 祥福審諦聖道師; 時節以至可屈尊。 善行質信知眾意, 其德普稱行等王, 浩無請友興普念; 至仁清淨踰若空, 所設辦訖枉神尊! 威御十方猛持世, 佛事十八而等有; 度眾最首悲踊行, 願與其眾時蒙至。 色妙端正相綵身, 琦好種種花繡文; 志樂歡悅惠法施, 大仁上導願察時。 鸞鳳哀鳴師子步; 梵聲清淨若雷震, 妙音具足悅諸十, 眾心忻望願時顧。 佛十三千無等倫, 弗有能知如來心; 聖尊明覩眾生行, 所修常應時降此。 知時普應懷權化, 了達眾牛有聖誓; 神威撿足願迴光。 詳審之行目明好, 眾生甚多普渴仰, 十力持勢威無慢; 大仁德峻勇而果, 聖性爾杆昇游此。 慚祥備足德最上, 寧救濟育遍無極; 師友無雙協懷眾, 化龍億百興有悲。 於世威猛普慈救, 達知眾行應如意; 輕舉神足願時至。」 開布散示唯天尊!

爾時世尊知阿耨達請時已到,告諸比丘:「著衣持器,差應留守,無熱龍王遙跪啟時,應受半月,宜便即就。」於時八萬四千菩薩皆大神通德具果辦,弟子二千亦上神足,侍遶世尊周匝而導,至真如來從鷲山頂忽昇虛空,神力而進,如其色像身放無數百千之光,遍照三千大千境界普悉晃明。諸欲、色天皆見世尊揚光無數飛過虛空,自相謂言:「神尊致彼無熱王所,將興法化演奧無極,及使如來為眾圍遶,即彼半月中,多諸天數百千眾,得見世尊又聞法說,緣復觀覩無熱所設莊嚴感變,而令世尊故遊到彼。」時諸天子各各發念供養如來,或願散花、或雨名香、或施天樂以歌佛德;或復懸幢、幡蓋、繒綵率隨如來!

世尊身光炤耀煒煒,明踰日月宿淨色淨及諸天光。佛之聖威神耀無量,根定寂靜行遊詳安,釋、梵、四天威變種種,奉敬追侍隨從如來。

於時聖尊到雪山下住止右面,便告賢者大目連言:「汝到無熱王所處宮,當宣告之:『如來已至,時可應入。』」

於是賢者大目犍連承佛神旨,忽遷無熱大池之中,現於虛空去地七丈,化身像者若金翅鳥王,住阿耨達龍王宮上,便告王言:「如來至也。」

彼諸龍眾及婇女等,無不愕然驚恐怖悸,衣毛為竪四之藏竄,展轉相謂:「此池自初無金翅鳥,斯從何來?」

時阿耨達告諸宮人、太子、眷屬而慰之曰:「且各安心勿恐勿怖,此為賢者大目連耳!承如來使興神足變。」

賢者目連到彼告訖,還詣世尊。

時阿耨達便與其眾——諸子、臣民、夫人、婇女——舉宮大小俱而 圍遶,各奉名花及美末香,并眾塗香、幢蓋、繒幡、倡伎種種調作 相應進抑正覺。

于時世尊!為諸菩薩及眾弟子、天龍、尊神所共圍遶,俱而前至無熱所設廣博座場。如來到已,尋就高顯師子之座,菩薩相次,然後弟子諸眾坐訖。

爾時龍王觀視世尊及諸菩薩、弟子、眾會坐悉而定,興心無量內懷怡悅,輒與其眾手執斟酌,所設饌具踰世甘肥,延有天味餚饍百種,以用供佛、菩薩、弟子并諸眾會,使皆充足。世尊菩薩及諸弟子飯畢,輒各洗蕩應器。察眾都訖,時阿耨達即啟如來:「願聞法說。」

於是世尊日昃時後,便從定起端坐說法。諸來會眾滿千由旬,從<mark>地</mark>至上中無空缺,天龍、鬼神及人非人,周匝衛遶至真正覺!一切會者各懷踊躍。

無欲行品第五

爾時龍王悅顏進前跪,重白佛:「唯願世尊!為斯眾會如應說法,令諸一切免離生死,精除相著五陰諸苦,穢垢昧昧勞塵之行,使其永無三毒意結,蒙及龍眾得棄邪冥,伏其心意,弘致至善使有悅豫,深行菩薩。後若如來現有存亡,當使吾等所在國邑護持正法。」於是世尊讚龍王曰:「善哉善哉!阿耨達王!諦聽其義,勤思念之以宣布示,吾當廣說,令此會眾,多免罪痛根拔雜想、意識志疑,使解普智昇遊三界。」

時龍王言:「善哉世尊!願樂廣說,當頂受行。」

是時聖尊告龍王曰:「有一法行,菩薩應者為天、世人甚所敬重。何謂為一?志修深法,以行無欲。何曰深法法行無欲乎?如是,龍王!菩薩依順因緣之無,離二見際知有無者斯見諸法,依著因緣不見有法不由緣生,彼作此念:『其依因緣,斯無依緣,彼不依魔。其依緣者,彼不言吾,亦不言我。又其依緣中無我我,依緣無主亦無執守。』其依順緣了解起生,速易得致四依之念。何謂為四?依於至義而不文飾,依於慧行不為識念,依順義經不依攀緣,依念於法而不為人。

「彼何謂義?何等為慧?云何順義?何謂念法?義謂空義;不受妄見無相之義;不著念識無願之義,不著三界無數之義,不著於數; 又復義者,於法非法而無其二,音聲無得,念想無念,法處無住, 用無人故,命壽言聲偽無所有。又復為義,其法義者為無欲義。

「何謂菩薩為法義?其無眼色、耳聲、鼻香、舌味、身更、心法之義;不生色義,不滅色義;不為痛、想、行、識之義,亦不生滅識行之義;亦不欲、色、無色之義,亦不生滅欲、色、無色義;亦不我義,亦無我見、著人之義;不有人義,亦不著人見入之義;亦不著入有佛身義,亦不法字著入之義,不數計會有著入義;亦復不有施、戒、忍、進、定、智著義。曉入一切諸法之義,是謂菩薩為法義也。其從是義而不有退,是謂為義。

「彼何謂慧?曰:苦無生慧;習無念慧;盡都盡慧;道無志慧。於陰幻法諸性法性而無毀慧;在於諸情空取為慧,解入諸法明了眾生,根滿具慧志念無忘。於諸止意不意無念;於諸斷意等善不善;於其神足身心建慧;又於諸根了輕重慧;於諸覺意覺諸法慧;而於諸力已降調慧。道為無數於滅寂慧,觀別法慧,始不生慧,來不至慧,中無住慧;於身像慧,言以響慧,心法幻慧,是謂菩薩明達智慧。

「又何謂為順導義經?從是因緣而起然者,滅於愚癡、滅於老死、無我,而然於無我、人及與命壽,深解諸物。若如來、我皆非真法,而然於三脫之門也。等於三世求三無著,所謂諸法見都無生,視了知者,而得等滅,離俗情態,菩薩來智,慧度無極,於諸意念而無疑惑,應入是行,斯謂順義;無所去至亦無從來,泥洹無為不有去至,是謂順義。

「何謂如法?若諸如來興與不興法身常住,是謂如來如如本無而無增減,不二無二真際法性,謂之如法。不毀行報無行報法,斯謂如法。大乘者由六度無極;緣一覺乘從因緣脫;聲聞之乘依音聲脫,是謂如法。施致大福;戒得生天;博聞多智;定念致脫,斯謂如法。從行不修興有生死,行之純至而立無為,如法之謂。愚以欲力;智則慧力,斯謂如法。其一切法悉依法性。

「如此,龍王!其依因緣而起生者,斯則應得四依之念,其依因緣 彼則不依斷著有無,是謂:其見因緣起者,斯見諸法;其見法者, 斯見如來!所以者何?因緣乎。龍王!等起無起,法於非法等而無 著。又如來者!亦為無著因緣之起,亦無有起,法不可得,覺其法 者,斯則如來!於因緣起,慧眼見之;慧眼見者,斯則諸法;見諸 法者,斯則如來!是謂:其見因緣起者,斯則見法,其見法者斯見 如來!

「又如來者以法見法。如是, 龍王!若以此法行應脫者, 斯謂菩薩 而無欲行。

「又呼龍王!無欲菩薩不作欲習,悅樂賢聖捨非賢聖,勤慕興護於 賢聖種,廣合諸慧為法作護,修於博聞志樹無忘。不捨戒身,智身 無傾,定身不動,於其慧身得善堅住,脫慧見身強固難轉,脫慧見 故。

「又復龍王!無欲菩薩得無數佛正法度義,亦具無數諸佛要慧,又 果無盡諸佛之辯,得通無量諸佛神足,因致無數諸佛權解,普入無 量眾生之行,遊過無數諸佛國土,因見無數百千如來,緣得聽聞無 數諸法,得無數義達無數慧,曉無數行度無數眾。

「若是, 龍王!無欲菩薩常應清淨, 消盡眾穢德不可量, 三界自由 不有所著。何則然者?以其無欲自從心生。

「有三事從心出生。何謂為三?從其欲生,又從愛生,亦由起生。 復有三生:觀於起生,又觀起生,又觀所行觀心無處。又復三生: 滅寂專一,曉解於觀,如法隨行。又復三生:德備仁調,以為寂 靜,從行勤生。又復三事:從於行直,而無有諂,仁慈調忍。復有 三事:無沈吟疑,順善不麁,志足易養。又復三事:從其空生,又 復無想,亦由無願。又復三事:心之所生諸法無常從其心生,諸法 皆苦亦由心生,諸法無我亦從心生。復有三事:而從心生諸法無 常,諸法無我,滅盡無為。皆從心生。

「如其,龍王!菩薩!等滅亦由心生,謂:其不捨普智心,行等一切,以大慈故;不捨眾生,大悲心故;不厭生死,用大喜故;等離喜怒,以大護故;所有慧施不望報故;眾戒學行德義備故。內免己過不論彼短,能忍眾生諸不善行,欲令彼人心固金剛,合集眾善諸德之本,身命無惜得致一切,諸定正受心無勞惓,不以正受而有所生,曉智以權順隨眾生,以其諦慧度諸志脫。欲達聲聞、緣覺乘者,顯念佛法求諸佛法,心能忍苦廣宣法故,眾利敬養蔑而棄之,志具諸相德行無厭,充滿智慧博勤多聞。習善友故值善知識;用謙敬故得應謙行;降自大故以降自大;志行備故具滿意行;用無諂故以離諂者;言行應故以其無欺;修誠信故以住信言;離眾欺故滅除

妄語;生誠信故降心於信。如是,龍王!其有菩薩而生是心,斯謂 無欲。

「又復龍王!無欲菩薩,魔不能得其限便也。所以者何?以彼菩薩 應無限故,而亦不行有限之法。彼何謂為是限法乎?欲婬、恚、癡 斯皆有限,菩薩於是不有所著,以此謂之為無限也。聲聞、緣覺其 乘有限,菩薩住於普智心者,魔終不能得其限便。有念無念念想有 限,菩薩以離眾念之應。如此菩薩,魔不能得其限便也。

「如是,龍王!有二魔事,而是菩薩當深覺之,亦當遠離。何謂二事?於其師友無恪敬心,而自處大貢高蔑人,是謂為二。又二魔事:捨菩薩六度無極藏,心返喜樂親行聲聞及緣覺法。復有二事。何等為二?無其智慧而欲行權,與諸墮著望見眾生樂相狎習,復有二事:寡聞少智自以慧達,雖有通博於中自大。又復二事:於德甚少妄生尊貴,若修德行而樂小乘。復有二事:正法不護,不度眾生。復有二事:志不樂習於諸菩薩及眾通達明智者俱,專行誹謗清高菩薩,主為法師數興蔽礙;又障師訓而多諛諂。又二魔事:捨諸德本,心存不德。復有二事:為非其人說深要法,應當為說而反不說。復有二事:不覺魔事,遠離普智意數錯亂。如是,龍王!其諸魔事色像若斯,無欲菩薩而永無此。

「又復龍王!若有菩薩修於清淨行應無欲,當致菩薩十六大力,以 此諸力降調己志以化眾生。何謂菩薩十六力耶?曰:得志力、意 力、行力、慚力、強力、持力、慧力、德力、辯力、色力、身力、 財力、心力、神力、弘法之力、伏諸魔力。無欲菩薩得是菩薩十六 大力。

「何謂菩薩為志力耶?如是,龍王!菩薩志力能覽諸佛一切所說總而持之,是謂志力。斯菩薩意應諸佛行,於諸眾生而無斷礙,是謂意力。能達一切音聲所說解了諸義,是謂行力。離諸罪行與眾德法,是則慚力。通達持法宣示等學而無遺忘,斯則持力。無著不忘於百千劫,其所可說無礙不斷隨解諸法,是則辯力。若諸釋、梵及四天王,往詣菩薩黯然無色,是端正力;以其寶首所可念願應意即至,是則財力。過諸外道在中獨尊,是則身力。眾生之心,能一其心知眾生心,順行化之,是則心力。眾生應以神足度者,為現神變使眾覩見,是神足力。若所說法使眾聞之而無中斷,彼受順行等除苦盡,是弘法力。若其禪定正受之時,得承佛旨賢聖行法,是降魔力。斯謂菩薩十六大力。

「其有行者志慕願此十六之力,而欲得者當修無欲。譬如,龍王! 一切河流歸於大海,道法諸行三十七品悉歸無欲。又若,龍王!諸 藥草木依因於地,諸善行法皆由無欲。譬如龍王、轉輪聖王眾生所樂,若此其有無欲菩薩,乃為諸天龍、鬼、世間人之所愛樂也。」爾時世尊為阿耨達并諸太子而說頌曰:

「欲為慧菩薩, 志願佛道者; 彼當離穢法, 常勤行無欲。 慧解因緣法, 不猗於見際; 想法以因缘, 無緣不有法。 緣牛彼無牛, 是不與自然; 善緣斯亦空, 知空彼無欲。 著緣而無相, 脫願寂復寂; 其處魔不審。 澹泊像大愚, 見法無著緣, 於其無吾我; 彼不有我、人, 知是則無欲。 無主不守護, 不獲亦弗捨; 本脫無取捨, 離欲常了法。 慧行常脫識; 觀義不為飾, 曉了順義經, 依法不為人。 空義是佛法, 及脫無相、願; 不猗浩見念, 是義其無欲。 音聲無可得; 於法不有二, 處法難可動, 不人義無欲。 法義無欲我, 眼耳不色聽; 鼻口離香味, 身心無更法。 又不離痛、想; 不色牛威儀, 亦無識住我, 達是應法義。 不住三界義, 亦無吾我義; 世尊無色身, 無字法說義。 計數非法義, 至要不以施; 非戒、忍、進、定、 慧無我世尊。 諸法解無義, 智謂是法要; 於義永非義, 無欲則佛法。 無生曉苦慧, 不起無有滅; 不生亦無終, 如是應尊習。 知其如法性; 五音解若幻, 了是為無欲。 曉內如空聚, 知法至趣向, 明達眾生情; 浙念以止意, 無欲得是慧。

```
意斷無有二,
        神足心輕騰;
        諸根知止足。
以力而無慢,
覺定解以智,
        明了八直道;
慧觀於滅行,
        解法所至歸。
        當來而未至;
本法不有生,
現在無住法,
        不欲知如是!
        語空譬如響;
身像無堅固,
心幻若如風,
        無欲解如是!
知說順義經,
        了達於因緣;
本癡牛死滅,
        無欲是慧義。
無我、人、命壽,
           解了法非法;
以脫於三門,
        所說空無著。
無生見滅道,
        習慧喻俗行;
不從心意生,
        無欲覺是行。
        佛興及滅度;
法性常如住,
無二覺不覺,
        無欲知是法。
        彼積悉諸法;
其積如本際,
空積及人際,
        無欲達是智。
法性常以住,
        覺起而滅度;
不識知其二,
        無欲法如是!
不殃善不善,
        知法無罪報;
        從行度無極。
佛法不從他,
        音脫聲單行;
以離因緣覺,
        彼見戒生天。
惠施致大富,
博聞得智慧,
        守意化眾生;
至聖都守意,
        無欲法如是!
        智慧志存法;
力常轉諸欲,
        法性常無得。
等念是諸法,
        而致四德行;
識智 因緣起,
        順義知無欲。
知義及與法,
觀緣彼見法,
        以法見世尊,
等於起滅法,
        無欲了尊法。
因緣跡無得,
        音聲法無字;
斯法得本無,
        是聖謂如來!
以慧見因緣,
        無見不見法;
明慧了因緣,
        是謂見世尊!
彼求無欲行,
        悅性諸賢聖;
法性毁不捨,
        而護聖賢種。
```

```
常護佛正法,
        無欲聞不忘;
戒根不捨離,
        於定達難動。
知身慧不動,
        常住於脫身;
及脫慧所見,
        無欲常安住。
解人諸佛法,
        無量眾聖道;
得佛神足具,
        辯達一切行。
知眾情意行,
        忽然遊諸土;
得見諸如來,
        受彼所說法。
        宣示無量人;
聞守解達義,
        志得向無數。
知彼億數行,
無數當自在,
        降心入功德;
伏意使無欲,
        終不遷是世。
諸陰心以脫,
        了知起滅處;
觀滅無所有,
        所習以而無。
聲性心所行,
        不諂常端直;
無佞調仁善,
        無欲德如斯!
          解苦知牛死;
以脫空、想、願,
無我法常寂,
        無欲從心行。
普知心等慈,
        以悲濟眾生;
喜不厭牛死,
        行護無有邊。
所施無望報,
        省己立諸行;
        念脫彼眾生。
忍耐善不善,
勤精強修德,
        不計有身命;
以次知諸定,
        亦不隨於定。
慧定大精進,
        於數不墮數;
以諦化聲聞,
        智不志滅度。
無欲值佛世,
        彼有此諸法;
魔不知其行,
        安住法了是。
        曉是貪茹根;
無欲不有限,
        魔不知其處。
離欲彼無想,
其想吾我應,
        彼自起魔事;
是悉度諸行,
        眾魔而不審。
        所行常清淨;
無欲志不忘,
無欲不意志,
        慚行而不毀。
以聞無欲者,
        悅慧敬如來!
        彼應如世尊!
其住如法住,
諸佛十力者,
        菩薩欲奉事;
        勤意當受持。
聞斯無欲行,
```

其聞此無欲, 悅信廣奉行; 彼常致無欲, 得佛是不久。 無欲聖所由, 而致最清淨; 無欲得成佛, 以化無有邊。 去來現在佛! 諸得眾相好; 悉從斯無欲, 及行是法故。」

爾時世尊說是無欲法品之時,諸在會者四萬二千天、龍、鬼神、人與非人,皆發無上正真道意;萬二千人得不起忍,又八千人逮柔順忍;三萬二千天子、神、龍,得離塵垢悉生法眼;又八千人而離欲行,八千比丘漏盡無餘。

當爾之時,三千大千世界六反震動,普遍十方熀然大明,於雪山下無熱池中,周匝現有所未見聞,光耀妙花皆至于膝,其池水中普生乃異,鮮飾蓮花大如車輪,中出美香,花色無數百千諸種,皆是佛之威神所致,亦為是法興其供養,以悅無熱龍王意故。

佛說弘道廣顯三昧經卷第二

西晉月氏三藏竺法護譯

信值法品第六

爾時阿耨達龍王心甚悅豫,又及龍王五百太子宿發無上正真道意,聞佛說是,尋即皆得柔順法忍,忻心無量各樂供養,輒為如來施飾寶蓋,進上世尊!同時白佛言:「聖師如來、至真、正覺!為吾等故出現生世。何則然者?令吾等聞普信道品。得聞是已,意而無惓不有懈退,亦無驚恐,聞以加重專心習行,樂聽無厭如是像法也。又惟,如來!解說菩薩云何得值諸佛世尊?」

如來告曰:「諸賢者等勤念受聽,吾當廣說。」 諸太子言:「唯思樂聞,彼諸上士受世尊教。」

如來告曰:「樹信賢者興值有佛。何謂為信?信謂:正士修諸明 法,奉之為先。何謂明法?曰:依行應不離德本,習求樂賢慕隨聖 眾,勤心樹信志無勞疲,思僥聞法拔棄陰、蓋,順習於道,得法利 養以施周慧,戒與不戒濟接等與,在諸恚怒而常有悅,勤樂普智心 無懈退,信佛不休、未曾亂法、悅心聖眾,志道難動喜樂正真,而 離貢高於眾自卑,常有等心諸處無著,終捨身命不造惡行,修立質 信言行相應,等過於著心無垢穢,身口意行順隨聖化,明了諸事得 為清淨,知足無貪所行應淨,曉入智幻習求慧根,依順七財修念誠 信,根、力以備而行正見,所受師友謙恪禮敬,安足易養數詣法 會,心無退厭有患生死,示無為德勤心精進,求昇普智以弘道化, 於如來法志樂出家,修諸無數梵清淨行,造立慈悲救彼眾生。志存 反復,其有報恩及不報者,等接護之心無適莫。不自念利常悅彼 恭,忍調之行以悉備足,目見無惡不背說人,內性以寂、志於閑 居、心常樂靜,專念習法而無諍訟,等己彼過。求備戒具,集合定 行,勤謹於道,斯謂賢者行應俗信。樹信如是,此謂興值佛世者 H7, 0

「又賢者等!其於世俗造信無忘,是謂興信值佛世也。又賢者等!何謂俗信?其有信者:信諸法空以離妄見、信知諸法以為無想而離念應、信知諸法悉皆無願不有去來;信知諸法無識無念,靜身口意寂無有識;信知諸法以為離欲,無我、人、壽命;信知諸法信知本無去來自然;信知諸法真際無跡如本無跡;信知諸法已皆自然等若空跡;信知諸法而依法性;信知諸法等過三世;信知諸法欲處邪見而皆悉盡,信法無著以離本癡本無清淨;信知諸法心常清淨,亦不興起客欲之垢;信知諸法無所觀見;信諸法護等斷眾行,信法無我

以過喜怒;信諸法無心無形像而不可獲;信諸法偽如握空拳誘調小兒;信法無欺不有上下無所捨置;信諸法虛若芭蕉樹;信法自由如常寂靜;信法無審不住三處;信法永無不有所生;信法若空以等無數;信知諸法若如泥洹常自寂靜。如是,賢者!其於世俗興起是信,斯謂造信而值佛法。

「又復賢者!其有信值佛法名者,此則名曰諸法都無起之謂也。所以者何?不色生故、不色無生,化轉之習,不痛、想、行、識,已無識起,不以眼、耳、鼻、舌、身、意,無起轉習。不身起轉、不癡有無、不生老死,有無起故。如值佛世,不起有生亦不起滅;又復無起習於無滅,不以正意無志意習而值佛世。總要言之,亦不以三十七道品法起無起習;亦不以道無生之習,不以起慧,亦不滅慧,不慧無慧,無二之習,如值佛世。」當說值信佛品世時,無熱龍王五百太子皆悉逮得柔順法忍。

當說值信佛品世時,無熱龍王五百太子皆悉逮得柔順法忍。 於是世尊復說頌曰:

「興信值佛世, 而習於不生; 斯不值佛世。 其無向信者, 修信謂最上, 從致清淨法; 行質有報應, 不違厥所修。 信習諸賢聖, 勤隨常禮敬; 心不有懈退, 此信之所行。 勤行聽法說, 陰、蓋不能動; 從信得致道, 行埭於柔順。 以法所得財, 轉惠普周濟; 護戒與毀戒, 行信而等施。 能悅諸恚怒, 道心不懈惨; 勤求大乘法, 有信悅向眾。 志常自卑下; 永離大貢高, 所在無所著, 立信相如是! 志信不惜身, 終不造惡行; 守善無妄語, 言行常相應。 悦信以過界, 樂行於無心; 身口意清淨, 習隨聖所護。 有信行內淨, 常為慧所將; 知身之要本, 求問官所聞。 等念於七財, 得力、根以足; 長離眾邪見, 志常習等行。 禮恪有悅心, 敬事如其師;

心宿善虔恭, 知足無所潰。 其心常無念, 所志唯道法; 有厭牛死者, 引示無為德。 脫之所當行, 唯常求悅心; 速離於是世, 修梵行無勝。 救彼無利望; 懷受諸眾生, 悅信當勤求。 當報所受恩, 己利不以悅, 亦不嫉彼供; 仁忍而悉備, 無諂調質直。 行信目所見, 不背說人短; 志悅樂閑居。 根寂性安敏, 其心無憒鬧, 白勵備恩行; 内省剋己過。 先順不有諍, 勤求具戒行, 專習於定道; 悦信慕樂行, 信者相如是! 其過欲信者, 彼行而解此; 興法不有諍, 深妙佛所說。 彼都無眾見; 誠信信於空, 諸法無有想, 不意離眾念。 當除斷諸念, 覺了去來事; 法求無著作, 不有於身心。 信為無欲法, 離我、人、壽命; 得至不二處。 信者解無本, 其本無有積, 體無若虚空; 便與法性同。 諸法信亦然, 等過於三世, 諸法無有漏; 欲處及與貪, 樂信無受見。 其本明清淨; 諸法不有著, 不處心有住。 客欲無能蔽, 因緣而無起; 諸法不可見, 常觀於高行, 不受所住短。 脫者無合同; 無合不有離, 愚之所可惑。 信悅於空法, 湛泊意無起, 欺偽如芭蕉; 口言而自然, 無去亦不有。 諸法無所有, 所見皆不要; 其法若虚空, 等緣無有數。 諸法如泥洹, 本無不可見;

信悅而行此, 解了身虚空。 其有如是信, 菩薩及凡人; 彼則值奉佛, 所處無有惡。 不以造色行, 得應值佛世; 無色不有處, 不來亦不去。 於色無有生, 不滅亦無住; 當來無所至, 值佛廣演說。 万陰亦如是, 化習轉無生; 值佛當敢說, 慧達諸菩薩! 其身及諸情, 亦習以無牛; 佛興以無生, 常救諸墮牛。 癡本無有生, 牛死亦如斯! 是緣如本無, 從法而有佛! 無起不有生, 不滅無有住; 是以知無處, 處亦不可見。 斯亦不自生, 與佛而博演; 無志不有住, 是亦佛所轉。 諸種亦如是, 佛種順如法; 斯類亦起無, 如佛而等與。 其行如是者, 佛興為若此; 悅信斯大處, 其限不可量。」

轉法輪品第七

爾時世尊告太子等:「又諸賢者!何謂菩薩得轉法輪?其有布露如是像法樂說句義,受持不忘修而行之,諸有不發大悲意者,為興普智隨順眾願,而為說之廣宣布示,志不有惓忽棄利養,勸念順時受持護行,斯謂菩薩應轉法輪。

「又若如來所轉法輪,而其法輪,行像入德當粗剖說。不以起法亦不滅法,不以凡夫下劣行法,亦復不以賢聖法故而轉法輪。又其法輪,不以無輪,不中斷絕等斷善惡,彼以是故為無斷輪。又其法輪因緣之起,不起無起而有其轉,以斯之故為無起輪。又其法輪,不以眼色、耳聲、鼻香、舌味、身更、心法諸情轉隨有轉,以此之故彼無二輪,若有二者則非法輪。又其法輪,亦不過去、當來、現在所著而轉,若有二者則非法輪。又其法輪,亦不過去、當來、現在所著而轉,是無著輪。又其法輪,不我見轉,非人、命壽所住而轉,是為空輪。又其法輪,不識行想滅念之轉,是無想輪。又其法輪,不於欲界形無形界所望而轉,是無願輪。又其法輪,不計眾生有異而轉,

不處二法,是凡人法、是聖戒法,是聲聞法、是緣覺法、是菩薩法、是為佛法,彼以是故為無異輪。又其法輪,不以有住法輪而轉,以斯之故為無住輪也。

「法輪名乎,諸賢者等!真諦正輪,常無毀故;要義之輪,等三世故;無處之輪,諸習見處以等過故;寂寞靜輪,身心無著不可見轉意識離故;無樔之輪,五道不處;審諦之輪,無諦現故;行信之輪,等化眾生用無欺故;不可盡輪,字無字故;法性之輪,以其諸法依法性故;本積諦輪,本無積故;本無之輪,如本無故;無所造輪,無念漏故;無數之輪,導至聖故;如空之輪,明見內故;無想之輪,無外念故;無願之輪,無內外故;不可得輪,修過度故。「又諸賢者!其如來者,以此法輪轉之眾生諸意行也,其轉不轉,彼不可得,法無所捨。」

於時世尊!說是轉法輪品之時,天、龍、鬼、人及諸種神欣心踊躍,顯光讚揚如來斯法,皆同聲曰:「善哉世尊!甚為難值,如來示說轉此法輪,聞者奉行則應法輪,是法名轉空虛之輪。諸已過佛及與當來并諸現在,悉由是法。其有信者斯則已度,諸行此法,吾等,世尊!代其勸助彼諸眾生,其興是心常欲聞斯法輪品者,聞當發求是道要行,彼亦不久得轉法輪。」

於是眾中聞是說者,有萬天人皆發無上正真道意,五千菩薩逮得法忍。

於是世尊告諸賢曰:「又正士等!其護正法、受持正法、營護正法,是謂護法。所以者何?於永無滅。應是行者,天及世人終不能當。」

於時無憂前白佛言:「又唯,世尊!若斯正士以如是法而得最覺,於其本無不有惑者;又如是像諸正士等當共擁護,所以護者,令諸正士使其速應於此大乘,彼皆行已得轉法輪,又能與識法之大明。是故,世尊!以斯等教要法正護使發大乘,以護法師安救敬禮順聽禁戒。」

是時世尊讚歎無憂龍王子曰:「善哉善哉!無憂正士!諸發大乘為法師故安救擁護,是謂護法,為諸法師營護正法護持正法。

「又復無憂!護正法者得十功德。何謂為十?無其自本降下貢高, 又行恭敬,亦無諂行,勤思樂法,志慕習法,專意隨法,行觀於 法,樂宣說法,樂修行法,隨所志乘順如說之。是為十行以護正 法。

「又復無憂!有十事行護得正法。何謂為十?若族姓子及於族姓女!所聞法師遙禮其處,思樂得奉,來輒敬愛,供給所欲衣被、飲食,護以諸事,往詣謙敬,順聽所說以宣同學,障其說非,常樂稱歎,使譽流布。是為十事得護正法。

「又復無憂!有四施行得護正法。何謂為四?筆墨素施給與法師; 衣被、飲食、床臥、醫藥供養眾所;若從法師聞所說法,以無諂心 而讚善之;所聞受持廣為人說。是為四施得持正法。

「又復無憂!有四精進得持正法。何謂為四?求法精進,勤廣說法,敬禮法師,若毀法人正法降之亦以精進。是四精進得持正法。」

時阿耨達五百太子,聞佛說是,悅懌欣喜歡樂無量,同聲言:「如來所說甚善無比,解諸狐疑。」各以宮室及其官屬,盡以上佛奉給所應,以敬順心而重言曰:「從今,世尊!當勤受化永常無惓,至於如來無為之後,佛之所說是像寶法,當共敬受是經要品,求索通達勸進修行。斯則,世尊!吾等至願,又若如來無為之後,吾等聖尊在所國邑,當共同心供養舍利,護奉禮敬至於現滅也。」於是賢者耆年迦葉謂諸太子:「又賢目等!如仁輩言,獨欲全完供養如來神身舍利。汝等是言,多斷眾生諸德之本,障蔽明淨翳道至化,使興是言。何則然者?又若如來本始造願,使留舍利布如芥子,為諸眾生降大悲故,何得全完而獨供養耶?」

彼正士等即答賢者大迦葉曰:「唯然,迦葉!勿以聲聞所有智限而限如來深邃無極明達之慧。所以者何?若如來者,有普智心一切之見,處以神足感動變化。若其興念,能使三千大千世界天、龍、鬼神,各於宮殿普令完全安置舍利,使各念言:『吾獨供養如來舍利,其餘者不。』又復迦葉!若如世尊無為之後,隨眾生心應置舍利。又復迦葉!若如來德,至阿迦膩吒天上立置舍利,其如芥子,能普明照一天地內。是佛世尊神威變化感動力也。」

決諸疑難品第八

爾時賢者須菩提曰:「諸族姓子!又如來者為滅度耶?」

曰:「須菩提!於起生處當有其滅。」

須菩提曰:「諸族姓子!如來有生乎?」

曰:「如來者,如其本無,無生而生。」

須菩提曰:「如如本無,無生不生,彼都無生也?」

答曰:「是者。須菩提!則佛所生如其本無而不有生。」

須菩提曰:「佛生如是,滅復云何?」

答曰:「亦復如如本無,生於無生,無為滅度亦爾本無。唯,須菩提!不起而生,滅度亦爾!如是其滅亦爾,本無也。」

說是語時,無熱淵池現大蓮花,若如車輪,[卅/敷]有無量種種之色,以名眾寶而用光飾,於諸花間有大蓮華色最暉明,現奇異好特獨踊高。

賢者阿難在於無熱大池之中,覩其變化,所見若斯,尋啟世尊: 「今此變化為何瑞應興其感動乃如此耶?」

如來告曰:「且忍,阿難!自當見之。」說適未久,忽從下方乃於 寶英如來佛土寶飾世界, 六萬菩薩與濡首俱, 忽然踊出遷能仁界, 昇於無熱大池之中,各現妙大蓮花座上,濡首童子即就蓮花高廣顯 座。

是時眾會皆悉見之,愕然而驚。時阿耨達及諸菩薩、釋、梵、持世 來會,諸眾悉各叉手稽首敬禮。濡首童子退住虚空,共持珠寶交露 之蓋。

時濡首與諸菩薩俱并蓮花座,亦踊虛空去地乃遠,於上而雨未曾所 見最妙蓮花,供養如來!從諸花中有聲出曰:「寶英如來問訊世 尊:『起居無量、體祚康強、神力安和乎?』聲復言曰:『濡首童 子與諸菩薩六萬人俱往詣忍土!至於無熱龍王淵池觀彼感變,又志 樂聽龍王所問莊飾道品入法要說,為世尊廣勸法言,便有懼 悦。』」於是濡首及諸菩薩從虛空下,悉詣正覺,稽首如來!於心

肅敬住世尊前。

爾時天師告濡首曰:「童子來乎!為何志故與諸菩薩俱至此耶?」 濡首白佛:「吾等世尊在彼寶英如來佛上寶飾世界,承聞至真能仁 如來!垂慈十方演說斯要。聞是法故,尋從彼十昇遊詣此奉禮天 師!緣聞如來所講法也。」

迦葉白佛:「近如?世尊!寶英佛土寶飾世界,而諸大志忽至此 耶?」

濡首答曰:「唯如迦葉坐一定時,極其神足飛行之力,盡其壽命於 中滅度,而由不能達到彼十,其國境界弘遠乃爾!」

佛告迦葉:「其十去此,過於六十恒沙佛剎乃至寶英如來佛土。」 曰:「其來久如而到此乎?」

答曰:「久如,耆年漏盡意得解也。」

大迦葉曰:「甚未曾有。唯然,濡首!是諸正上神足若斯。」

濡首又曰:「耆年漏盡意解久如耶?」

答曰:「如其轉意之頃。」 又曰:「耆年意以解乎?」

答曰:「以解。」

濡首復曰:「其誰縛心而有解乎?」

答曰:「濡首!以心結解,非脫有解致慧見也。」

曰:「唯,迦葉!其無縛心以何解乎?」

迦葉答曰:「知心無縛,斯則為解。」

曰:「唯,迦葉!以何等心?云何知心?過去知耶?當來、現在 乎?去者滅盡,當來未至、現在無住,以何等心而知其心?」

曰:「心已滅者,是濡首即無身心之計數也。」

曰:「賢者心知其滅耶?」

曰:「心滅者不可得知。」

曰:「其得致都滅心者,彼永無有身識之得?」

曰:「大辯哉!濡首童子!吾等微劣,豈能應答上辯之辭?」

濡首又曰:「云何迦葉!響寧有辭耶?」

曰:「無。童子!因緣起耳!」

曰:「不云乎,唯、大迦葉!一切音聲若響耶?」

曰:「爾!」

濡首又曰:「響辯可致不乎?」

曰:「不可致。」

又曰:「如是。唯,大迦葉!菩薩協懷權辯之才不可思議,亦無其斷,若耆年問,從劫至劫,菩薩機辯難可究盡。」

爾時迦葉而白佛言:「唯願世尊加勸濡首!為此大眾弘講法說,令諸會眾長夜致安,普使一切得明法要。」

於是眾中有大菩薩,其名智積,問濡首曰:「何故,童子!長老迦葉年耆極舊,所言怯弱微劣乃爾?為以何故名之耆年?」

濡首答曰:「是聲聞耳!故不果辯。」

智積復曰:「斯不知發大乘志耶?」

曰:「永不矣!唯以聲聞乘之脫也。」

曰:「又濡首!何故名為聲聞之乘?」

濡首答曰:「是族姓子!世尊能仁隨諸眾生,興三乘教敷以說法,有聲聞乘、緣一覺乘及大乘行。所以然者?由此眾生意多懷貪、志劣弱故,說三行耳!」

智積又曰:「云何?濡首!如空、想、願都無其限,何故限之有三乘乎?」

曰:「族姓子!是諸如來執權之行,空無想願不有其限,為諸著限而諸有限,終不限於無限行也。」

曰:「又濡首!吾等可退,使永莫與劣志眾生得有會也。」

濡首答曰:「諸族姓子!且忍。當從無熱龍王聞其智辯及無量 法。」

耆年迦葉謂智積曰:「云何正土!如彼寶英如來佛土,云何說 法?」

智積答曰:「唯一法味,從其一法演出無量法義之音,但論菩薩不 退轉法,諸佛奧藏要行之論,從已取脫不由眾雜,依於普智永無餘 脫,恒講菩薩清純之談,其土都無怯弱之行也。」

時阿耨達問濡首曰:「仁尊濡首來奉如來!為何等像觀於如來?以 色觀耶?痛、想、行、識觀如來乎?」 答曰:「不也。」

「以約言之,色苦觀耶?痛、想、行、識苦觀之乎?滅色、痛、 想、行、識觀耶?為以空無想願行觀如來乎?」

答曰:「不也。」

又問:「云何去、來、現在相好,肉眼、天眼、慧眼觀如來乎?」

答曰:「不也。」

「云何?濡首!以何等相觀如來耶?」

答曰:「龍王!觀於如來當如如來。」

又曰:「軟首!如來云何乎?」

曰:「如來者無等之等,等不可見,用無雙故,故妙矣。龍王!如來極尊,無偶無雙、無比無喻、無儔無等、無匹無倫、亦無色相。為其無像、無形無影、無名無字、無說無受也。如是,龍王!如來若此,當作是觀觀於如來!亦不肉眼、天眼、慧眼而觀如來。所以者何?其肉眼者以見明故,如如來者無冥無明,故不可以肉眼而觀;又天眼者有作之相,若如來者等過無住故,不可以天眼而觀;又其慧眼知本無相,又如來者眾都永無,故不可以慧眼而觀。」「云何?軟首!觀其如來得為清淨?」

曰:「若, 龍王! 其知眼識心不有起, 又知色識心無起滅, 其作是觀觀於如來, 為應清淨。」

爾時其從寶英如來寶飾佛土菩薩來者,得未曾有,而皆歎曰:「甚快妙哉!斯諸眾生善值如來!逮聞如是龍王所問決狐疑品,聞已悅信,不恐不怖又無驚怪,加復受持諷誦宣布,如是正士應在慧署。吾等,世尊,不空至此,值聞是要無極像法。又若,世尊!斯法所至聚落國邑,當知其處如來常在,終不滅度,正法無毀道化興隆。何則然者?以此法品能降魔場伏諸外道也。」

時阿耨達謂軟首曰:「善修行者軟首童子!斯之菩薩逮聞是法得佛 不難,進己勸人勤道無惓也。」

「何謂菩薩應修善行?」

軟首答曰:「若是,龍王!如貪行空,施行亦空,等解於此是謂善行。以約言之,不戒與戒、懷恚及忍、懈退精進、亂意一心、如其 愚空智慧亦空,於是等行,斯謂善行。

「又復龍王!如其婬欲、恚怒、愚癡為之空者,無其婬欲、恚、癡 亦空;如參行空,無雜亦空。於其等行,是謂善行。

「又復龍王!如其八萬四千行空,賢聖正脫亦悉為空,於斯等行, 是謂善行。

「又復龍王!若有明賢修菩薩行,無行無不行,亦不見行;不有惑 行,亦無念行,又不知行,於是等行,是謂善行。」

無熱龍王謂軟首曰:「云何?童子!菩薩行於無所行乎?」

說是語時,三萬四千天、龍、鬼神、菩薩行者,逮無從生法樂之 忍。

佛說弘道廣顯三昧經卷第三

不起法忍品第九

時阿耨達謂軟首曰:「不起法忍當云何得乎?」

軟首答曰:「忍不生色、痛、想、行、識,是調菩薩得不起忍。

「又復龍王!菩薩所得不起法忍,等見眾生以致是忍;等彼眾生如 其所生;等見眾生亦無有生;等見眾生以如自然;等見一切若如其 相,亦不與等而見其等,是謂菩薩等見忍空。

「云何為空?眼以色識、耳之聲識、鼻而香識、口之味識、身所更識、心受法識。如諸情空,其忍亦空、過忍亦空、現忍亦空,如其忍空,眾生亦空。何用為空?以欲為空,恚、怒、癡空,如眾生空,顛倒亦空,欲垢起滅亦悉為空,作是智行,斯謂菩薩。行應不起法忍之者,其等眾生已應向脫。何則如是?又彼菩薩而作是念:『如其以空,至於我垢及諸眾生,空無所有。御欲如此,是欲已脫,於本自無。一切眾生,如此之忍於欲自在,以脫是欲根寂無處,其永不滅無脫不脫,亦無有得至脫者也,若斯永脫則彼是故住處自然。』

「又此,龍王!若有菩薩行應忍者,拔度一切不有其勞。所以者何?見諸眾生本都無縛,於本自脫。彼作此念:『是諸眾生悉著一欲,行者不著而脫本法,一切眾生著其不諦妄想之念,菩薩了此,終始無著已脫法本』。

「又復龍王!得不起法忍菩薩者,雖未得達佛要行處,然是菩薩不住凡夫、學無學處,普入諸處習度無惓,不於欲處有其婬行、恚處不怒、癡處不愚;不於處所以無欲住離眾欲際,御持諸姓導化眾生,自無欲垢貪著穢行。彼於魔界及與佛界,并自然相而無疑惑,亦不念其法性之處。普現於彼眾生之界,了知識處、法非法處,曉入行處以慧而觀。於行之處及生死處,亦不生死入隨生死,所在諸處為造德本守靜不疲,解知生死如無生死,不以賢聖修應而脫。」時阿耨達謂軟首曰:「如仁軟首而作是言,菩薩不以修應向脫,其曉是學斯則菩薩修應向脫。何謂菩薩修應向脫?」

軟首答曰:「得不退轉,是謂菩薩修應向脫。

「又復龍王!菩薩曉知有念未脫,為諸隨念眾生等故,建立精進化轉無念,言有吾我亦為未脫。

「又復龍王!其菩薩者已無吾我,向諸縛著眾生類故,為起大悲而 以度之。彼見生死都無生死,生諸所生以其無生,眾生無生而皆等 見,為諸倚著眾生之故現生受身,永無其生亦不有終,是慧菩薩應 修向脫,執權而還還住生死,現在所生受身之處,濟化愚冥導以智 慧,得免罪苦;菩薩以空故應寂向脫,以權而還反于生死,為諸眾 生興發大悲,菩薩無相修應向脫;弘權而還還遊生死,向諸隨念眾 生之故為起大悲;菩薩無願修應向脫,執權而還還住生死,為諸隨 願眾生之類,向發大悲化行無願脫乎。

「龍王!菩薩解入無所有法,不捨眾生入於無我及人命壽,不忘道場,曉入無量果致大人三十二相,終寂靜寞無寂不寂亦無其亂,等過諸行,無心意識不違本願,昇普智心等離眾念,權曉眾生種種意行,得賢聖者及非賢聖,勤以精進立正聖法無淫泆行,建志不捨,寂與不寂等皆濟度,無念不念,其不整者佛土莊飾嚴整立之,過俗向脫脫不離俗。如是龍王!以執智權有賢聖定,是為菩薩修應向脫。

「譬如,龍王!聲聞之行修應向脫,名曰往還。以成其道,不能前進發於無上、建立大悲而化眾生。如其菩薩亦應修脫無復動搖,成不退轉往還乎。龍王!修應向脫,無疑會當得至道果。又如菩薩修應向脫,都不忘於聲聞之果受菩薩道,以是聲聞修應向脫為有其限,如菩薩者永無其限。譬如龍王!有二匹夫在峻山頂而欲自投,其一人者力贔勇悍,權策通捷宿習機宜,曉了諸變無事不貫,從其峻山而已自投,忽爾復還住彼山頂,由其勇勢爽健猛達,身昇最力輕騙翻疾,強惈所致而使無墮亦不所住。如其一人志怯意弱亦無權謀,於其山上不能自投。如是龍王!其菩薩者於空無相願,觀覩諸法無所作念,如是觀訖,又復能以權慧之力,為眾生故住普智心。其峻山者謂是無數;其慧博達顯大力者,譬執權慧行菩薩也。其修權慧菩薩行者,不處生死不住無為,是謂菩薩披普智鎧。如入死生抽拔眾生,令發菩薩大乘之行;其劣弱者住彼山上不能返還,譬之聲聞不入生死無益眾生。

「若是, 龍王! 其有菩薩聞是脫慧要行品者, 斯輩, 世尊! 皆得堅固於無上正真道意,疾近佛坐濟度三界。」 說是法時, 會中菩薩七千人得不退轉。

眾要法品第十

時阿耨達龍王太子,其名感動,前白佛言:「今吾,世尊!以無貪心自歸三尊,願使是經久住於世,護正法故。唯,世尊!志發無上正真道意,願造斯行樂興達之,得了心本,明曉道本及諸法本,自致成佛最正之覺,當廣宣道化潤眾生。又唯,世尊!其諸菩薩聞此清淨大道法品而不信樂不奉行者,當知斯輩菩薩之類,為魔所魘,

亦不得疾近普智心行。所以者何?從斯世尊法品要義出生菩薩,自致成佛、伏魔外道,去、來、現在諸佛正覺皆由是法。」

爾時賢者須菩提謂太子:「感動!如仁賢者了解心本、明盡道本及諸法本,若得成其覺諸法者,此何心本而得了耶?」

曰:「其本者,唯,須菩提!是之本者以心本也。」

須菩提曰:「心為何本?」

曰:「本乎婬、怒、癡也。」

曰:「婬、怒、癡為何本耶?」

曰:「以念、無念為本也。」

須菩提曰:「云何,賢者!婬、怒、癡本,為從其無念興起生 耶?」

曰:「須菩提!姪、怒、癡本,不念無念亦不生也。又其本者,不 起為本。又須菩提!所可言者此何心本?為心本者其本清淨,斯謂 心本。如本清淨,彼無婬欲、恚怒、癡垢。」

曰:「族姓子!欲生起生,彼從何生?而常生生如無斷耶?」

曰:「須菩提!其欲當生而已生生,於心本者不有著生。唯,須菩提!若彼心本有其著者,則終無致至清淨者;是故心本都無著也。由是知欲亦為清淨。」

須菩提曰:「云何族姓子!了知欲耶?」

曰:「以因緣之起生也,其無因緣為不有生。唯,須菩提!修淨念者了欲無也。」

須菩提曰:「又云何乎?族姓子!菩薩為應修淨念耶?」

曰:「須菩提!菩薩於行而修諸行,是謂菩薩修淨行者也。唯,須菩提!其有菩薩都為眾生,被大德鎧化至泥洹,等見眾生本如泥洹,是則菩薩修淨念行。唯,須菩提!其菩薩者,為諸聲聞及緣一覺隨應說法,不隨是化,斯謂菩薩修淨念行。唯,須菩提!又彼菩薩自寂其欲、靜眾生欲,是謂菩薩為修淨行。又須菩提!其菩薩者,在於淨念而見不修,又於不淨而見修淨,是謂菩薩修淨行者。」

爾時須菩提謂王太子感動曰:「又云何乎?族姓之子!菩薩於淨而見不修,於其不修見淨修念?」

曰:「須菩提!修淨念者,謂修眼色、耳聲、鼻香、舌味、身更、心所受法,見悉不修、法性無二,謂修。三界不著是菩薩住,住以善權,斯曰修念。菩薩作此行,須菩提!則謂修淨念行者也。」於是世尊歎太子曰:「善哉善哉!如若正士感動所言,修淨如斯!是為菩薩應修淨行。今若所說皆佛威神,其有菩薩修行如此,是乃應興大乘之行,當知斯輩堅固普智。」

於是太子感動白佛:「云何,世尊!菩薩得以無欲之心應自歸佛?」

曰:「族姓子!若有菩薩了知諸法無我、人、壽,無色無想亦無法相,不於法性而見如來!如是菩薩為應無欲自歸命佛。如如來法彼則法性,如其法性為普所至,有得致是法性之法則知諸法,斯謂菩薩以無欲心應自歸法。其法性者,彼為無數。習無數者即是聲聞。又如菩薩等見無數,於其無數而不有數亦不二者,斯謂菩薩以無欲心應自歸依。」

說是語時,太子感動得柔順忍,來會色、欲諸天、龍、人,聞此法品等二萬眾,皆發無上正真道意。

受封拜品第十一

爾時龍王阿耨達與宮夫人、太子、眷屬俱而圍繞,自歸三尊,都以宮室并池所有,供奉世尊及比丘僧以為精舍,又復言曰:「吾今,世尊!興發是願,從斯大池出流四河充于四海,從其!世尊!四河之流,若龍、鬼、人、飛鳥、走獸,二足、四足有含命類,飲此流者,願其一切皆發無上正真道意。宿不發者,飲此水已使成其行,速在佛座,降却魔眾、伏諸外道。」

時世尊笑。諸佛笑法口出五色,奮耀奕奕光焰無數,震照十方無量 佛世,明踰日月、須彌珠寶,諸天、魔宮及釋、梵殿,一切天光盡 翳無明。

是時無數億千天眾,莫不懷悅發願聖覺。光徹阿鼻諸大地獄,有被明者尋免眾苦,皆志無上正真道意。還繞世尊乃無數匝,忽從頂入。

爾時賢者名曰披耆(晉言:辯辭也),見其光明輒從坐起,整著衣服偏袒右臂,向佛跪膝恭撿又言,歎頌世尊,而以偈曰:

「其色無量見者悅, 人雄至最獨世尊! 滅除眾冥與大明, 執持威神說笑意。 百福所詠德七滿, 得智光明演慧行; 為法上講惟法王, 世尊今笑何瑞應? 具見誠諦常樂信, 根定寂靜眾權敬; 化度一切以寂然, 德過無極說笑故。 梵聲清徹甚軟和, 鸞音商雅踰諸樂; 眾音備足無缺減, 解散笑故宣布示。 智脫之明應慧度, 行常清淨樂淡然; 權曉眾行普智具, 賢聖導王說笑義。

智辯诵達慧無極, 現力無量神足備; 十力已具普感動, 天師現笑用何故? 身光無數照杏冥, 大千眾明不能蔽; 威聖之光無等倫。 踰越日月及珠火, 功德滿足若如海, 順化菩薩以智明; 懷慧無限散眾疑, 興發何故而有笑? 權道眾牛除諸穢; 尊度三界無有極, 能淨欲垢化無餘, 天顏含笑為誰興? 如來所由普感動, 震動天龍諸鬼神; 稽首受禮於法王, 蒙說笑意決眾疑。」

是時佛告耆年辯辭賢者:「汝見阿耨達不?供如來故造此嚴飾。」曰:「然。世尊!已而見之。」

曰:「是龍王以於九十六億諸佛,施種德本,今受封拜,如吾前世為定光佛世尊所決:『汝當來世得致為佛,號名能仁如來、無著、平等正覺、通行備足、為最眾祐、無上法御、天人之師,號佛、世尊!』是時龍王為長者子,其號名曰比守陀來(來丹本未,晉言:淨意),聞吾受決尋轉興願:『使吾來世得其拜署,若斯梵志,為是定光佛所決也。』爾時淨意長者子者,阿耨達是!又斯龍王當於賢劫中,在此池中莊飾種種,鮮交眾寶若天宮室,當悉進奉賢劫千佛。斯諸如來盡知王意,率皆說此清淨法品,悉坐是處等亦如今;又及如前拘樓秦佛、文尼、迦葉,同共坐此師子之座,及其最後樓至如來,亦當轉此法品要義。無熱龍王當供養賢劫千佛從聞是法,諸佛眾會悉同如今。是阿耨達後無數世,奉諸如來事眾正覺,修梵淨行常護正法勸進菩薩!然後七百無數劫已,當得作佛,號阿耨達如來、無著、平等正覺、通行備足、無上法御、天人之師,為佛、世尊!

「如是賢者!無熱如來得為佛時,其土人民都無貪婬、恚怒、愚癡,永無相侵不相論短。何則然者?以彼眾生志行備故。如是賢者!阿耨達佛、至真、如來,乃當應壽八十億載,弟子之眾亦八十億,如其始會之為清淨,從始至終無異缺減,如此之比數百千會,當有通辯受決菩薩四千億人都悉集會,又諸發意菩薩行者不可計數。

「無熱如來當為佛時,其土清淨紺琉璃為地,天金分錯飾用諸寶, 以眾明珠造作樓閣及經行地。彼土眾生若興食想應輒百味,悉得五 通。其國處所人民居止,但以珍琦、被服、飲食、娛樂自由,悉如 第四兜術天上。彼不二念,又無貪欲婬行之心,而諸眾生法樂自 娛,其土人民都無欲垢。若彼如來敷雨法說不有勞想,神變無數以 演洪化,宣示經法永無其難,方適說法眾生輒度。何則然者?以彼一切志純熟故。

「又其如來自於三千大千世界,唯一法化無外異道;又若如來欲會 眾時,輒放身光盡明其界,彼土人民尋皆有念:『世尊覺來將演法 化故揚光耳!』各承佛聖神足飛來詣佛聽法。

「又彼如來終無不定,乘大聖神忽昇空中去地七丈,就其自然師子之座,廣為眾會進講法說,普土見之,譬如覩其日月宮殿明盛滿時。眾生種德故生彼土,其國人民觀於世尊師子之座,懸在虛空而無所著,尋解諸法亦空無著。當爾之時悉得法忍。其如來者但說金剛定入之門,不有聲聞、緣覺雜言。所以唯演金剛定者,譬如金剛所可著處靡不降徹。而彼如來所可說法,亦如金剛,鑽碎吟疑住著諸見。

「如是賢者!阿耨達佛若現滅度,而其世界有尊菩薩,名曰持願,當授其決然後現滅。其佛方滅,持願菩薩即得無上最正之覺,尋補佛處,號曰等世如來、無著、平等正覺!其土所有神通菩薩及上弟子眾會多少,如阿耨達!」

時阿耨達王之太子名曰當(丹常)信,敬心悅欣,以寶明珠、交露飾蓋進奉如來,叉手白佛:「誰當於時得為持願菩薩者耶?」是時世尊知王太子當信意向,告阿難曰:「其時持願菩薩大士當補佛處者,今龍王子當(丹常)信是也!時阿耨達如來方滅,持願菩薩尋昇佛座;又其等世如來、無著、平等正覺方適得佛,亦便轉此法品正要。」

當佛說是封拜品時,四萬菩薩得無從生忍,十方世界來會菩薩、釋、梵、持世、天、龍、鬼神,聞佛說此封拜法已,悉皆喜悅懽心踊躍信樂遂生,五體稽首各還宮殿。

阿耨達王與諸太子眷屬圍遶, 勅伊羅蠻龍象王曰:「為如來故造作 交露琦珍寶車,使其廣博殊妙無極,當以奉送至真正覺!尋應受 教。」輒為如來化作七寶珠交露車,令極高大廣博嚴飾。世尊菩薩 及諸弟子悉就車坐,無熱龍王太子眷屬,心懷恭恪手共挽車,從其 宮中出于大池,如來神旨忽昇鷲山。

囑累法藏品第十二

於是世尊到鷲山已,即告慈氏、軟首童子并眾菩薩曰:「諸族姓子!以阿耨達所問道品宜重宣廣,使諸未聞而得聞之。」 慈氏、軟首而俱白佛:「唯願如來垂慈當說。」 於時世尊尋輒揚光,光色無數,天地震動至于六反,光明鑠鑠乃曜十方,十方佛土諸尊菩薩神通備者,尋明飛來,到皆稽首各便就 坐。王阿闍世、夫人、婇女、太子、眷屬、舉國臣民、長者、居士、梵志、學者,見是光明,又聞如來從無熱還,各捨其事悉詣鷲山,到世尊前肅然加敬叉手為禮,問訊如來:「景福無量乎!」即退還坐觀佛無厭。

如來身光明,悉普至無極世界,諸大地獄眾窈冥處靡不降徹,諸在地獄無不被明。又其光明而出聲曰:「能仁如來於無熱池弘說清淨道品要法,今還鷲山而重演化。」又其音聲徹諸地獄,十方地獄眾生之類,所受苦痛應時得免,悉遙見佛及諸眾會,皆自悲嗟:「嗚呼世尊!吾等受此苦痛無數地獄之酸,六火圍遶燒炙苦毒,鋒瘡萬端鑊湯之難,諸變種種更斯眾痛日月彌遠。善哉世人,值奉如來,稟佛道化得離三苦,吾等宿世雖遇諸佛,不受法化使被眾痛,蒙賴如來所說法品,令諸殃罪而輒微輕。」

當爾之時,十方地獄一切眾生,得萬有億千,悉發無上正真道意, 遙承佛聖, 皆同聲曰: 「一切苦痛本為清淨, 其了本者則無顛倒, 吾等但坐不了之故,更諸地獄眾苦無數,願使一切速解正真。」 爾時佛告慈氏菩薩、軟首童子及阿難曰:「諸族姓等!當勤受此是 經要說,持諷誦讀以宣流布,廣為學者演說斯法,使諸四輩加心專 習,是慧要行積辯句義。若族姓子及族姓女,發心怡悅向樂是經, 當為斯畫解此奧藏深邃諸義,道之無府眾經所歸,諸佛積要微妙無 量,若所授者,當令字句了了分明使無增減。又諸族姓若賢男女, 在於過去恒沙諸佛所作功德施行種種,受持諸佛所可說法,一一專 習勤心奉行。若復施、戒、忍、進、定、智,行是六度億百千劫, 奉是諸佛并眾弟子,衣被、飯食、床臥、醫藥、香華、伎樂,進諸 所欲;又造精舍經行之地,奉敬如是不可稱計;至諸世尊般泥洹 已,為諸如來起七寶塔,——供養諸如來塔,香華、伎樂、繒綵、 幡蓋、進然香燈,又懸夜光明月諸寶,供養如是極多無數,斯所行 德集會計之,都不如是族姓男女逮得一聞此阿耨達龍王所問決諸狐 疑法品義也。所以者何?以斯法藏出生諸佛菩薩要行慧之最故,何 況奉持、執卷誦讀,以無疑心體解深妙,復以所聞宣示流布,斯諸 功德不可測量也。」

是時慈氏、軟首童子、賢者阿難俱白佛言:「甚未曾有。唯然,世尊!又若如來慈降一切興有大悲,乃為十方去來現在菩薩行者、天、龍、鬼神、諸眾生故,弘說是法無極清淨道品之義。又復世尊!若族姓子及族姓女,聞阿耨達龍王所問決狐疑經,不即受持樂習誦讀,又不廣博布示等學,亦不興心勸助之者,當知是輩族姓男女,以為眾魔及魔官屬,并邪外道之所得便,常在羅網結疑中也。」

時佛歎曰:「快哉所言!誘進一切使習斯法,令行應之。」如來又 曰:「當以是經數為四輩宣廣說之。」

爾時慈氏、軟首菩薩、賢者阿難皆白佛言:「唯願世尊輒當受持布演是法。又復世尊!此經名何?當云何奉?」

世尊告曰:「斯乎族姓!名『阿耨達龍王所問決諸狐疑清淨法品』,亦名『弘道廣顯定意』,當勤受持斯經之要。又族姓等!是道品者珍護諸法經之淵海也。」

慈氏菩薩、軟首童子及諸來會神通菩薩,釋、梵、持世、天、龍、鬼神同聲白佛:「甚善如來!快說是法。吾等,世尊!在所聚落、國界、縣邑有行是法,當共躬身營護斯輩,其聞此者令無邪便;吾等亦當受持是經,使普流布而常無斷。」

佛歎慈氏、軟首童子并眾菩薩曰:「善哉諸族姓子!卿等所言勸樂 將來諸學菩薩,快甚乃爾!」

佛說此已,十方來會神通菩薩七萬二千悉逮顯定;五萬四千天、 龍、鬼、人,皆發無上正真道意;五千天人得生法眼。阿耨達龍 王、慈氏菩薩、軟首童子、一切菩薩、賢者阿難,來會四輩,及諸 天、龍、種種鬼神,人與非人,聞佛說是,莫不歡喜,稽首佛足各 便而退。

佛說弘道廣顯三昧經卷第四

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".